



NEGERI KEDAH DARUL AMAN

Warta Kerajaan

DITERBITKAN DENGAN KUASA

GOVERNMENT OF KEDAH DARUL AMAN GAZETTE

PUBLISHED BY AUTHORITY

Jil. 54
No. 3

3hb Februari 2011

*TAMBAHAN No. 3
PERUNDANGAN*

K. P.U. 10.

AKTA KERAJAAN TEMPATAN 1976

UNDANG-UNDANG KECIL PELESENAN ANJING DAN RUMAH
PEMBIAKAN ANJING
(MAJLIS PERBANDARAN KULIM) 2009

SUSUNAN UNDANG-UNDANG KECIL

Undang-undang Kecil

1. Nama, pemakaian dan permulaan kuat kuasa
2. Tafsiran
3. Pelesenan anjing
4. Daftar dan pengeluaran lesen
5. Pemakaian kolar anjing dan lencana
6. Kehilangan lencana
7. Pertukaran pemunyaan anjing berlesen
8. Sekatan yang dikenakan ke atas pemeliharaan anjing

Undang-undang Kecil

9. Kehendak kebersihan berkenaan dengan pemeliharaan anjing
10. Perlindungan terhadap penganiayaan dan tindakan mudarat
11. Anjing berpenyakit
12. Kacau ganggu kerana salakan tidak berhenti-henti, pembuangan najis dan selainnya
13. Anjing hendaklah diikat, dsb. dan tidak dibenarkan berkeliaran
14. Serangan anjing dsb.
15. Anjing merbahaya
16. Penangkapan atau pembinasaan anjing-anjing yang berkeliaran
17. Rumah pembiakan anjing hendaklah dilesenkan
18. Pengeluaran lesen
19. Kuasa untuk memasuki dan memeriksa
20. Tiada tanggungan atas pegawai
21. Penalti
22. Mengkompaun kesalahan

JADUAL PERTAMA

JADUAL KEDUA

JADUAL KETIGA

JADUAL KEEMPAT

JADUAL KELIMA

AKTA KERAJAAN TEMPATAN 1976

UNDANG-UNDANG KECIL PELESENAN ANJING DAN RUMAH
PEMBIAKAN ANJING
(MAJLIS PERBANDARAN KULIM) 2009

PADA menjalankan kuasa yang diberikan oleh seksyen 73 Akta Kerajaan Tempatan 1976 [*Akta 171*], Majlis Perbandaran Kulim membuat dan menurut seksyen 103 Akta tersebut, Pihak Berkuasa Negeri Kedah mengesahkan Undang-undang Kecil yang berikut:

Nama, pemakaian dan permulaan kuat kuasa

1. (1) Undang-undang Kecil ini bolehlah dinamakan **Undang-Undang Kecil Pelesenan Anjing dan Rumah Pembiakan Anjing (Majlis Perbandaran Kulim) 2009**.

(2) Undang-undang Kecil ini hendaklah terpakai bagi Majlis Perbandaran Kulim sahaja.

(3) Undang-undang Kecil ini hendaklah berkuat kuasa mulai dari tarikh penyarannya dalam *Warta*.

Tafsiran

2. Dalam Undang-undang Kecil ini, melainkan jika konteksnya menghendaki makna yang lain—

“anjing berlesen” ertinya anjing yang dilesenkan di bawah undang-undang kecil 4:

“dokter veterinar” ertinya doktor veterinar sebagaimana yang ditakrifkan dalam seksyen 2 Akta Doktor Veterinar 1974 [*Akta 147*];

“lencana logam” ertinya lencana logam seperti yang tersebut dalam undang-undang kecil 4(2)(c);

“Majlis” ertinya Majlis Perbandaran Kulim;

“pegawai diberi kuasa” ertinya mana-mana pegawai Majlis yang diberi kuasa dengan sempurna oleh Yang Dipertua;

“pemunya” berhubungan dengan anjing ertinya orang yang memilik, menjaga atau mengawal anjing itu, tetapi jika timbul keraguan mengenai keempunyaan seseekor anjing, pemunya atau penduduk premis yang sering didatangi oleh anjing itu atau orang yang sering memberi makan anjing itu hendaklah disifatkan sebagai pemunya sehingga dibuktikan sebaliknya oleh, pemunya, penduduk atau orang itu;

“rumah pembiakan anjing” ertinya mana-mana bangunan, pegangan atau premis di mana suatu pengusahaan yang berkaitan dengan pemeliharaan, pembiakan, penyimpanan atau latihan anjing dijalankan bagi maksud-maksud komersial;

“Setiausaha” ertinya Setiausaha Majlis Perbandaran Kulim;

“tempat awam” ertinya mana-mana lapangan terbuka, tempat letak kereta, kebun bunga, taman rekreasi dan bersuka-suka atau medan, sama ada terkepung atau tidak, yang dikhas atau diuntukkan bagi kegunaan orang ramai atau yang terbuka kepada orang ramai pada bila-bila masa.

“Yang Dipertua” ertinya Yang Dipertua Majlis Perbandaran Kulim dan termasuklah Timbalan Yang Dipertua;

Pelesenan anjing

3. (1) Tiada seorang pun boleh mempunyai, memelihara, melindungi atau menyenggara seseekor anjing yang telah mencapai umur tiga bulan melainkan jika anjing itu dilesenkan di bawah Undang-undang Kecil ini.

(2) Sesuatu lesen jika tidak digantung atau dibatalkan terlebih dahulu hendaklah terus berkuat kuasa dari sesuatu tempoh yang tidak kurang dari dua belas bulan dari tarikh kuatkuasa dan hendaklah diperbaharui pada atau sebelum tarikh tamat tempoh lesen itu.

(3) Walauapapun di dalam Undang-undang Kecil ini, Yang Dipertua boleh mengeluarkan lesen yang sah berkuat kuasa selama tempoh tidak lebih dari tiga puluh enam bulan dari tarikh kuat kuasa lesen berkenaan.

(4) Suatu permohonan untuk lesen hendaklah dibuat kepada Yang Dipertua dalam apa-apa bentuk dan syarat-syarat sebagaimana yang diperuntukkan oleh Yang Dipertua dan hendaklah disertakan dengan fi sebagaimana yang ditetapkan dalam Jadual Pertama.

Daftar dan pengeluaran lesen

4. (1) Yang Dipertua hendaklah menyimpan dan menyenggarakan, dalam apa-apa bentuk yang difikirkannya patut dan sebagaimana yang ditetapkan dalam Jadual Kedua apa-apa daftar yang difikirkannya perlu bagi maksud-maksud Undang-undang Kecil ini.

(2) Selepas menerima suatu permohonan untuk lesen dan fi yang dinyatakan, Yang Dipertua hendaklah—

(a) mendaftarkan anjing yang berkenaan dengan membuat suatu catatan dalam daftar yang menghuraikan butir-butir anjing yang hendak dilesenkan dan nama serta alamat pemunya;

(b) menguntukkan nombor pendaftaran bagi anjing itu;

(c) mengeluarkan kepada pemunya anjing itu suatu lesen dalam bentuk lencana logam yang sesuai yang mempunyai nombor siri yang sama dengan nombor pendaftaran anjing itu; dan

(d) mengeluarkan kepada pemunya anjing itu suatu resit bagi fi yang dibayar.

Pemakaian kolar anjing dan lencana

5. Pemunya seekor anjing yang berlesen hendaklah mengadakan kolar anjing yang sesuai untuk dipakai oleh anjing itu pada setiap masa dan lencana yang dikeluarkan di bawah undang-undang kecil 4 hendaklah dipasang dengan sempurna pada kolar itu mengikut cara yang membolehkan lencana itu dilihat dengan jelas apabila kolar itu dipakai oleh anjing itu.

Kehilangan lencana logam

6. Tiada penggantian boleh dikeluarkan bagi lencana logam yang hilang, tetapi pemunya anjing berkenaan boleh mendapatkan suatu lesen baru atas permohonan dan pembayaran fi sebanyak seratus ringgit (RM100.00).

Pertukaran keempunyaan anjing berlesen

7. Jika terdapat pertukaran keempunyaan seseekor anjing berlesen, pemunya yang baru hendaklah dalam tempoh sebulan dari pertukaran itu, memberitahu Yang Dipertua mengenai pertukaran sedemikian dan Yang Dipertua hendaklah mencatatkan nama dan alamat pemunya baru itu dalam daftar dengan percuma.

Sekatan yang dikenakan ke atas pemeliharaan anjing

8. (1) Tanpa menjejaskan undang-undang kecil 3, tiada seorang pun boleh memelihara, melindungi, menyenggara atau membenarkan dipelihara, dilindungi atau disenggara—

(a) lebih daripada dua ekor anjing di premisnya yang mempunyai keluasan 925.51 meter persegi atau kurang; atau

(b) lebih daripada empat ekor anjing di premisnya yang mempunyai keluasan melebihi 925.51 meter persegi.

(2) Tiada seorang pun boleh memelihara, melindungi, menyenggara atau membenarkan dipelihara, dilindungi atau disenggarakan seekor anjing di tingkat yang lebih tinggi daripada tingkat bawah sesuatu bangunan.

Kehendak kebersihan berkenaan dengan pemeliharaan anjing

9. (1) Pemunya seekor anjing berlesen hendaklah memastikan bahawa anjing itu dan tempat di mana anjing itu dipelihara disenggarakan dalam keadaan bersih pada setiap masa.

(2) Pemunya seekor anjing berlesen hendaklah membuang apa-apa bahan najis anjing itu daripada premisnya dan pembuangan bahan najis sedemikian hendaklah dijalankan mengikut cara atau melalui kaedah yang tidak berkemungkinan menyebabkan kesalahan atau kacau ganggu kepada mana-mana orang lain.

Perlindungan terhadap penganiayaan dan tindakan mudarat

10. (1) Pemunya seekor anjing berlesen hendaklah memastikan bahawa anjing itu diberi makan dan disenggarakan dengan sempurna.

(2) Mana-mana orang yang—

- (a) dengan zalimnya memukul, menendang, memperlakukan secara kejam, menyiksa, menyebabkan kemarahan atau menakutkan mana-mana anjing berlesen, atau menyebabkan sedemikian, atau dengan sewenang-wenangnya atau dengan tidak munasabahnya melakukan atau tidak melakukan apa-apa perbuatan, menyebabkan kesakitan atau penderitaan yang tidak perlu kepada anjing itu;
- (b) mengangkut, membawa atau membenarkan mana-mana anjing berlesen itu diangkut atau dibawa mengikut cara atau kedudukan yang menyebabkan kesakitan atau penderitaan yang tidak perlu kepada anjing itu;
- (c) menyebabkan, mengakibatkan atau membantu dalam pelagaan mana-mana anjing berlesen;
- (d) tanpa apa-apa sebab atau alasan munasabah, memberi atau membenarkan diberi apa-apa ubat atau bahan beracun atau memudaratkan kepada mana-mana anjing berlesen, atau dengan sengaja menyebabkan apa-apa ubat atau bahan sedemikian dimakan oleh anjing itu;
- (e) gagal mengambil langkah-langkah yang perlu untuk memastikan bahawa anjing itu tidak mengganggu jiran-jirannya, disebabkan oleh salakan yang tidak berhenti-henti atau selainnya;
- (f) gagal mengambil langkah-langkah yang perlu untuk memastikan bahawa anjing itu tidak merayau di luar premis pemunya dan hendaklah memastikan anjing itu di bawah kawalan seseorang dengan cara diikat dengan tali cawak atau dirantai pada setiap masa apabila dibawa keluar daripada premis pemunya; atau
- (g) gagal mengambil langkah yang ketat untuk memastikan bahawa anjing itu tidak dibawa ke mana-mana tepian pantai, laut atau mana-mana kolam renang untuk bermandi-manda atau ke mana-mana tempat awam.

maka orang itu adalah melakukan suatu kesalahan penganiayaan di bawah Undang-undang Kecil ini.

(3) Bagi maksud-maksud Undang-undang Kecil ini, seorang pemunya hendaklah disifatkan sebagai telah melakukan penganiayaan jika dia telah gagal menjalankan penjagaan dan penyeliaan yang munasabah untuk melindungi anjing itu daripada perbuatan-perbuatan yang dinyatakan dalam perenggan (2).

Anjing berpenyakit

11. (1) Sekiranya seekor anjing berlesen berpenyakit, pemunya anjing itu hendaklah dengan segera membawa anjing itu untuk diperiksa dan dirawat oleh seorang doktor veterinar dan anjing itu tidak boleh diibenarkan disimpan di premis pemunya melainkan jika anjing itu telah diperiksa dan dirawat oleh doktor veterinar itu, telah dibenarkan oleh doktor veterinar itu untuk disimpan di premis pemunya.

(2) Jika ternyata kepada Yang Dipertua bahawa seekor anjing berlesen mengalami apa-apa penyakit, Yang Dipertua boleh, melalui notis bertulis, menghendaki pemunya anjing itu membawa anjingnya untuk diperiksa oleh doktor veterinar dalam tempoh tujuh (7) hari di atas perbelanjaan pemunya.

(3) Jika mana-mana anjing berlesen telah diperiksa oleh seorang doktor veterinar di bawah perenggan (1) atau (2) dan doktor veterinar itu berpendapat bahawa anjing itu mengalami penyakit haiwan, pemunya anjing sedemikian hendaklah dengan serta-merta memberitahu Yang Dipertua mengenainya, dan Yang Dipertua boleh menyebabkan anjing itu ditangkap dan ditahan untuk pengasingan atau pembinasan untuk mencegah merebaknya apa-apa penyakit merbahaya sedemikian.

(4) Yang Dipertua boleh menahan anjing berlesen yang berpenyakit itu dalam pengasingan selama apa-apa tempoh yang perlu bagi mengawasi dan merawat anjing itu, dan jika dia berpuas hati bahawa anjing itu tidak lagi berpenyakit, maka Yang Dipertua hendaklah memberitahu pemunya supaya mendapatkan kembali anjing itu dalam tempoh tujuh (7) hari setelah membayar kos-kos yang ditanggung Yang Dipertua bagi penahanan dan rawatan sedemikian.

(5) Jika anjing berlesen itu tidak didapatkan kembali oleh pemunya atau pemunya enggan membayar kos-kos yang ditanggung oleh Yang Dipertua di bawah perenggan (4), Yang Dipertua boleh menyebabkan anjing itu dijual, dibinasakan atau selainnya dilupuskan dan tiada pampasan kena dibayar kepada pemunya oleh Yang Dipertua.

(6) Jika Yang Dipertua berpuas hati bahawa adalah perlu bagi seekor anjing berlesen yang berpenyakit itu dibinasakan, dia hendaklah melupuskan bangkai anjing itu sebagaimana yang difikirkan patut dan tiada pampasan kena dibayar kepada pemunya bagi pembinasan sedemikian.

Kacau ganggu kerana salakan tidak berhenti-henti, pembuangan najis dan selainnya

12. (1) Pemunya seekor anjing berlesen hendaklah mengambil segala langkah perlu untuk memastikan bahawa anjing itu tidak menyebabkan apa-apa kacau ganggu kepada kawasan persekitaran atau alam sekeliling, khususnya melalui salakan tidak berhenti-henti atau selainnya.

(2) Pemunya seekor anjing berlesen hendaklah mengambil segala langkah perlu untuk memastikan bahawa anjing itu tidak membuang najis atau kencing di tempat awam.

Anjing hendaklah diikat, dsb. dan tidak dibenarkan berkeliaran

13. (1) Pemunya seekor anjing berlesen hendaklah memastikan bahawa anjing itu berada di bawah kawalan berkesan seseorang melalui tali ikatan atau rantai pada setiap masa apabila anjing itu dibawa keluar daripada premis pemunya.

(2) Pemunya seekor anjing berlesen hendaklah memastikan bahawa anjing itu tidak berkeliaran di luar premisnya.

Serangan anjing dsb.

14. (1) Jika seekor anjing berlesen mengejar, menyerang atau menggigit mana-mana orang, sama ada atau tidak ada apa-apa kecederaan dilakukan, pemunya anjing itu adalah melakukan suatu kesalahan.

(2) Tanpa menjejaskan perenggan (1), pemunya anjing itu adalah bertanggungjawab untuk membayar ganti rugi bagi kecederaan yang dilakukan oleh anjing itu.

(3) Jika apa-apa kecederaan sedemikian telah dilakukan oleh seekor anjing berlesen dan wujudnya suatu keraguan tentang siapa pemunya anjing itu, penghuni mana-mana rumah atau premis di mana anjing itu dipelihara atau dibenarkan tinggal atau berada pada masa kecederaan itu hendaklah dianggap sebagai pemunya anjing itu, dan hendaklah bertanggungjawab bagi kecederaan itu melainkan jika dia membuktikan bahawa dia bukanlah pemunya anjing sedemikian pada masa itu.

(4) Jika terdapat lebih daripada seorang penghuni dalam mana-mana rumah atau premis yang mempunyai bilik atau tempat tinggal sewaan, penghuni bahagian tertentu atau premis itu yang di dalamnya anjing itu dipelihara atau dibenarkan untuk tinggal atau berada pada masa kecederaan itu hendaklah dianggap sebagai pemunya anjing itu.

(5) Tiada pampasan kena dibayar kepada mana-mana orang di bawah Undang-undang Kecil ini berkenaan dengan kecederaan yang dialami dalam mana-mana rumah atau premis kecuali atas bukti bahawa dia telah memasuki rumah atau premis sedemikian mengikut perjalanan biasa tugas-tugasnya atau dengan kebenaran nyata atau tersirat penghuni itu.

(6) Tiada liabiliti jenayah boleh berbangkit di bawah Undang-undang Kecil ini berkenaan dengan apa-apa kecederaan yang dialami oleh mana-mana orang dalam mana-mana rumah atau premis melainkan jika seseorang itu telah memasuki rumah atau premis sedemikian mengikut perjalanan biasa tugas-tugasnya atau dengan kebenaran nyata atau tersirat penghuni itu.

Anjing merbahaya

15. (1) Yang Dipertua boleh mengambil maklum akan aduan bahawa seekor anjing berlesen adalah merbahaya dan tidak dipelihara di bawah kawalan sepatutnya.

(2) Jika ternyata kepada Yang Dipertua setelah mengambil maklum akan aduan itu bahawa anjing sedemikian adalah merbahaya, Yang Dipertua boleh membuat suatu perintah mengarahkan pemunya memelihara anjing itu di bawah kawalan sepatutnya.

(3) Jika seekor anjing berlesen dibuktikan telah menyerang atau mencederakan mana-mana orang, anjing itu boleh dikira sebagai anjing merbahaya.

(4) Dalam Undang-undang Kecil ini, seekor anjing berlesen disifatkan tidak dipelihara di bawah kawalan sepatutnya jika anjing itu tidak disarung mulutnya ataupun diikat dengan tali ikatan atau rantai.

(5) Jika pemunya gagal mematuhi perintah sebagaimana yang diarahkan oleh Yang Dipertua di bawah perenggan (2) atau jika telah dibuktikan bahawa anjing berlesen itu telah sekali lagi menyerang atau mencederakan mana-mana orang, Yang Dipertua boleh memerintahkan supaya anjing itu ditangkap dan dibinasakan, dan tiada pampasan kena dibayar oleh Yang Dipertua kepada pemunya kerana pembinasaan itu.

Penangkapan atau pembinasaan anjing-anjing yang berkeliaran

16. (1) Mana-mana anjing yang berlesen didapati berkeliaran di tempat awam boleh ditangkap oleh Yang Dipertua atau pegawai yang diberi kuasa dan ditahan sehinggalah pemunya anjing itu menuntutnya dan membayar fi yang dinyatakan dalam Jadual Ketiga.

(2) Jika mana-mana anjing yang ditangkap mengikut Undang-undang Kecil ini didapati adalah seekor anjing berlesen melalui lencana yang dipakainya, Yang Dipertua hendaklah menyampaikan kepada orang yang nama dan alamatnya telah dicatatkan dalam daftar sebagai pemunya suatu notis yang menyatakan bahawa anjing itu telah ditangkap dan akan dijual atau dibinasakan jika tidak dituntut dalam masa tujuh (7) hari dari tarikh notis itu.

(3) Suatu notis di bawah Undang-undang Kecil ini boleh disampaikan—

- (a) dengan menyerahkan notis bertulis itu kepada orang yang kepadanya notis itu hendaklah disampaikan;
- (b) dengan meninggalkan notis bertulis itu di alamat orang itu sebagaimana yang dinyatakan dalam daftar;
- (c) dengan mengeluarkan notis bertulis melalui pos ke alamat orang itu sebagaimana yang dinyatakan dalam daftar; atau

(5) Sesuatu notis yang dihantar melalui pos hendaklah disifatkan sebagai telah disampaikan tidak lewat dari hari ketujuh selepas hari notis itu diposkan, dan untuk membuktikan penyampaian adalah mencukupi bagi membuktikan bahawa surat yang mengandungi notis itu telah dialamatkan dan diposkan dengan sempurna.

(6) Jika mana-mana anjing berlesen yang ditangkap mengikut Undang-undang Kecil ini—

- (a) telah ditahan—
 - (i) selama tujuh hari selepas penangkapannya; atau
 - (ii) dalam hal notis yang disampaikan mengikut perenggan (2), selama tujuh hari selepas notis itu disampaikan; dan

(b) tidak dituntut oleh pemunya atau pemunya enggan membayar fi yang dinyatakan, maka Yang Dipertua boleh menyebabkan anjing itu dijual, dibinasakan atau selainnya dilupuskan.

(6) Yang Dipertua boleh menyebabkan seekor anjing yang tidak berlesen ditangkap di bawah perenggan (1) dibinasakan sebaik sahaja ia ditangkap jika Yang Dipertua berpendapat bahawa anjing itu berada dalam suatu keadaan yang menghendaki anjing itu dibinasakan dengan serta-merta.

(7) Yang Dipertua tidaklah bertanggung untuk membayar apa-apa pampasan kepada mana-mana pemunya bagi apa-apa kecederaan atau kematian mana-mana anjing semasa anjing itu ditahan.

(8) Yang Dipertua tidaklah bertanggung untuk membayar apa-apa pampasan kepada mana-mana pemunya bagi apa-apa jualan, pembinasakan atau pelupusan mana-mana anjing di bawah perenggan (5) atau (6).

Rumah pembiakan anjing hendaklah dilesenkan

17. (1) Tiada seorang pun boleh membina atau menggunakan mana-mana bangunan, pegangan atau premis sebagai rumah pembiakan anjing melainkan jika dilesenkan oleh Yang Dipertua di bawah Undang-undang Kecil ini.

(2) Suatu permohonan untuk lesen hendaklah dibuat dalam apa-apa bentuk dan syarat-syarat sebagaimana yang diperuntukkan oleh Yang Dipertua dan sebagaimana yang ditetapkan dalam Jadual Keempat dan pemohon boleh dikehendaki untuk mengemukakan keterangan menyokong bahawa notis sewajarnya mengenai rumah pembiakan anjing yang dicadangkan itu telah diberikan kepada mana-mana orang yang tinggal atau menduduki mana-mana bangunan atau premis dalam kawasan di mana terletaknya rumah pembiakan anjing itu, dan bahawa kegunaan tanah yang dicadangkan sedemikian mematuhi pelan pembangunan atau sesuatu kebenaran perancangan yang dibenarkan di bawah Akta Perancangan Bandar Dan Desa 1976 [Akta 172].

(3) Jika notis mengenai rumah pembiakan anjing dicadangkan itu sebagaimana yang tersebut dalam perenggan (2) dikehendaki diberikan, Yang Dipertua hendaklah mengambil kira apa-apa bantahan yang berbangkit.

(4) Untuk menentukan sama ada untuk meluluskan suatu permohonan untuk lesen, Yang Dipertua hendaklah secara khususnya, tetapi tanpa menjejaskan budi bicaranya untuk menahan lesen atas alasan lain, mengambil kira keperluan untuk memastikan—

(a) bahawa anjing-anjing itu akan pada setiap masa ditempatkan mengikut kesesuaian saiz, pencahayaan, pengedaran udara dan kebersihan;

(b) bahawa anjing-anjing itu akan dibekalkan secukupnya dengan makan-minum dan tempat tidur yang sesuai;

(c) bahawa segala langkah munasabah akan diambil untuk mencegah merebaknya penyakit berjangkit di antara anjing-anjing itu, termasuk penyediaan kemudahan pengasingan yang mencukupi;

- (d) bahawa langkah-langkah yang berpatutan akan diambil dalam hal kebakaran dan kecemasan yang lain; dan
- (e) bahawa suatu daftar disimpan yang mengandungi perihalan mana-mana anjing yang dimasukkan ke dalam rumah pembiakan itu, tarikh kemasukan dan keluar, nama dan alamat pemunya, dan daftar sedemikian hendaklah sentiasa disediakan untuk pemeriksaan Yang Dipertua atau pegawai yang diberi kuasa.

Pengeluaran lesen

18. (1) Apabila permohonan diluluskan, fi lesen sebagaimana yang ditetapkan dalam Jadual Keempat hendaklah dibayar.

(2) Yang Dipertua hendaklah mengeluarkan lesen kepada pemohon, dengan atau tanpa syarat sebagaimana yang difikirkan perlu atau suai manfaat oleh Yang Dipertua untuk memastikan segala atau mana-mana perkara yang dinyatakan dalam undang-undang kecil 17(4), dan lesen itu adalah sah sehingga 31 Disember tahun tamatnya lesen tersebut dan boleh diperbaharui apabila fi yang ditetapkan dibayar tetapi boleh dibatalkan oleh Yang Dipertua pada bila-bila masa jika Yang Dipertua tidak berpuas hati dengan perjalanan rumah pembiakan itu atau jika pemohon telah melanggar mana-mana syarat yang dikenakan.

Kuasa untuk memasuki dan memeriksa

19. (1) Bagi maksud menentukan sama ada suatu kesalahan telah dilakukan atau sedang dilakukan terhadap Undang-undang Kecil ini, Yang Dipertua atau pegawai yang diberi kuasa boleh, pada bila-bila masa yang munasabah dan tertakluk kepada perenggan (2) memasuki dan memeriksa—

- (a) mana-mana bangunan, pegangan atau premis di mana Yang Dipertua mempunyai sebab untuk mempercayai bahawa seseorang sedang menjalankan suatu rumah pembiakan anjing;
- (b) mana-mana bangunan, pegangan atau premis yang berkenaan dengannya suatu lesen untuk menjalankan rumah pembiakan anjing telah dipohonkan di bawah Undang-undang Kecil ini; dan
- (c) mana-mana bangunan atau premis yang berkenaan dengannya suatu lesen yang telah diberikan mengikut peruntukan-peruntukan Undang-undang Kecil ini sedang berkuat kuasa.

(2) Jika mana-mana bangunan atau premis digunakan pada keseluruhannya atau sebahagiannya sebagai tempat kediaman, Yang Dipertua atau pegawai yang diberi kuasa boleh memasuki bangunan atau premis sedemikian hanya selepas mendapat keizinan penghuni atau tuan punya bangunan atau premis ini, dan jika keizinan tidak diberikan, selepas dua puluh empat jam notis terdahulu.

Tiada tanggungan atas pegawai

20. Tiada apa-apa tanggungan boleh dikenakan ke atas Majlis atau mana-mana pegawai kerana apa-apa kerugian atau kerosakan yang berbangkit dari perjalanan kuasa-kuasa yang sah di bawah Undang-undang Kecil ini dan pegawai itu tidak boleh dikenakan apa-apa jua tindakan, dakwaan, tanggungan atau tuntutan apa jua pun yang berbangkit dari perjalanan kuasa-kuasa tersebut yang sah.

Penalti

21. Mana-mana orang yang melanggar atau gagal untuk mematuhi mana-mana peruntukan Undang-undang Kecil ini adalah melakukan suatu kesalahan dan apabila disabitkan, boleh dikenakan denda tidak melebihi dua ribu ringgit atau penjara selama tempoh tidak melebihi satu tahun atau kedua-duanya.

Mengkompaun kesalahan

22. (1) Mana-mana kesalahan di bawah Undang-undang Kecil ini boleh dikompaun oleh Yang Dipertua atau pegawai yang diberi kuasa.

(2) Jumlah wang yang boleh dikutip bagi mengkompaun mana-mana kesalahan di bawah Undang-undang Kecil ini tidak boleh melebihi tiga ratus ringgit.

(3) Tawaran untuk mengkompaun mana-mana kesalahan di bawah Undang-undang Kecil ini dan penerimaan tawaran sedemikian hendaklah dibuat dalam borang yang diperuntukkan oleh Majlis.

JADUAL PERTAMA

(undang-undang kecil 3(3))

Anjing betina	RM50.00
Anjing jantan	RM50.00
Anjing jantan (dimandulkan)	RM40.00
Anjing betina (dimandulkan)	RM40.00

Setiap anjing yang akan dilesenkan hendaklah mendapat surat perakuan kesihatan yang dikeluarkan oleh Jabatan Perkhidmatan Veterinar Negeri atau Jabatan Perkhidmatan Veterinar Daerah atau klinik Veterinar Swasta.

JADUAL KEDUA

(undang-undang kecil 4(1))

Anjing yang tidak boleh dilesenkan adalah seperti yang berikut:

1. *Pit Bull Terrier/ Pit Bull* (juga dikenali sebagai *American Pit Bull*, *American Pit Bull Terrier*, *American Staffordshire Terrier* dan *Staffordshire Bull Terrier*)
2. *American Bulldog*
3. *Neapolitan Mastiff*
4. *Japanese Tosa*
5. *Akita*
6. *Dogo Argentino*
7. *Fila Brasileiro*

JADUAL KETIGA

(undang-undang kecil 16)

Caj untuk seekor anjing setiap hari — RM2.00

JADUAL KEEMPAT

(undang-undang kecil 17(2))

Baka anjing yang dikawal pemeliharaannya. Lesen akan dikeluarkan setelah mendapat kebenaran bertulis daripada Pengarah Perkhidmatan Veterinar Negeri Kedah—

1. *Rottweiler*
2. *Doberman*
3. *German Shepard/ Alsatian* termasuk *Belgian Shepard* dan *East European Shepard*
4. *Bull Mastiff*
5. *Bull Terrier*
6. *Perro de Presa Canario* (juga dikenali sebagai *Canary Dog*)

JADUAL KELIMA

(undang-undang kecil 18)

Fi lesen tahunan untuk rumah pembiakan anjing-RM 150.00

Dibuat pada 12 April 2009
[MPKK.BUU.008002/SP UUKPBTNK/132]

Yang Dipertua
Majlis Perbandaran Kulim

Bertarikh 20 Oktober 2010
[PSU(K) 98/1396 Jld. 8 SK. 20]

ABD. RASHID BIN OTHMAN
Setiausaha
Majlis Mesyuarat Kerajaan
Kedah

LOCAL GOVERNMENT ACT 1976

LICENSING OF DOGS AND KENNEL ESTABLISHMENTS
(KULIM MUNICIPAL COUNCIL) BY-LAWS 2009

ARRANGEMENT OF BY-LAWS

By-Laws

1. Citation, application and commencement
2. Interpretation
3. Licensing of dogs
4. Register and the issuance of licence
5. Wearing of dog collar and badge
6. Loss of badge
7. Change of Ownership of licensed dog
8. Restrictions imposed on the keeping of dogs
9. Sanitary requirements regarding the keeping of dogs
10. Protection against cruelty and harmful actions
11. Diseased dog
12. Nuisance by incessant barking, defecation and otherwise
13. Dogs to be on leash, *etc.*, and not to be straying
14. Dogs attacks, *etc.*
15. Dangerous dogs
16. Seizure or destruction of stray dogs
17. Kennel establishment to be licensed
18. Issuance of licence